

廣靈縣誌卷之四

風土誌

昔者太史陳詩以觀民風用以辨貞淫察治忽占盛衰風俗之關於治道匪渺小矣廣邑舊誌稱士有武健之習民尚雀角之爭禮義奪於凶荒疾病惑於巫鬼又好氣輕生喜鬪健訟以聚衆歛錢告官告吏爲辦公事由今觀之殆不誣也夫地瘠民貧旣不免唐魏之儉嗇使其克敦古處循理守法何患邊荒之不
如鄒魯乎如仍舊習而不改難望風俗之日上矣誌
風土

廣靈縣誌

卷四 風土

一鄉俗

縣屬居民專務農業應童子試者不過百餘人諸生入則橫經出則負耒士亦農也又其性戀土懷鄉不能牽車服賈凡俯仰交際租稅之費皆取給於田豐年每畝不過數斗居民生長山谷間目不覩奇技淫巧故工匠頗拙亦無他端雜藝婦女不習紡織致富之術百無一焉幸其俗尚儉朴男恥爲盜女少邪行古風猶存塞外矣

正月元旦男女夙興庭院燃煤一堆謂之旺火陳菓脯酒肴祀神祭先畢稱觴爲長者壽以次序拜饌先

匾食已而拜賀交錯燕會數日乃止元夕蒸麵盞燃之中庭仍徧處布置至通衢神祠十四至十六日共爲燈山火樹以慶太平十六日老幼更相結伴出遊云除百病正月初五十六七月初一五月初一冬至等日定更後闔邑婦女皆出大門外燒楮哭聲震天更餘乃止名曰哭節近來紳士能禁約眷屬者亦或不哭二月二日各家早起汲水謂之引龍清明日男女插柳枝備酒脯香楮拜掃塋墓五月五日群插艾葉食角黍飲雄黃酒小兒手足繫束綵縷以避五毒六月六日曬麪曝衣澡浴初伏日亦然七月七日折

柳枝掛楮錢插田中以報田祖日夕婦女列香菓於庭穿針乞巧十四日薄暮採麻穀薦時食於祖先次日祭墳仍將麻穀置之塚上八月中秋節具月餅瓜果饋遺親族至晚陳列菓品剖瓜賞月九月重陽具棗糕菊酒饋遺如中秋十月朔日祭先塋剪紙爲衣焚化墓上謂之送寒衣十一月冬至晨起拜賀一如元旦禮十二月初八日以雜豆棗栗和粳米煮粥食之名曰臘八粥二十四日除舍宇夜供糖餅棗菓祀竈除夕易門神桃符貼綵聯陳祀儀以修歲事選木聲洪者於次早震響以驚厲鬼

一縣屬兼產五穀一曰粟穀有黃白二種三月穀雨後
耩種六月中旬吐穗八月秋分後成熟約一百五十
日收穫一曰黍五月芒種時耩種六月下旬吐穗八
月白露後成熟約一百餘日收穫一曰稷米有黎黑
二種早晚同黍一曰稻五月上旬栽種七月中旬吐
穗九月中旬成熟約一百二十日收穫一曰小麥二
月春分時耩種五月初旬吐穗六月小暑後成熟約
一百二十日收穫一曰大麥三月清明時耩種五月
初旬吐穗六月初旬成熟約一百日收穫一曰蕎麥
初伏耩種八月上旬出槩子九月上旬成熟約七十

日收穫一曰高糧有黑白紅三種三月下旬耩種六
月中旬吐穗九月寒露前成熟約一百六十餘日一
曰黃豆小滿時耩種七月中旬結角白露後成熟約
一百二十日收穫一曰黑豆早晚同黃豆一曰葫蘆
三月下旬耩種六月中旬出槩八月上旬成熟約一
百二十日收穫大率廣俗民間常食以小米黍米爲
主豆及雜糧佐之其大米飯小麥麩俗所珍惜以供
賓祭之需非常食所用至蕎麥高糧則不堪久貯云
一縣屬婚娶其行禮之序有三一曰換帖媒妁之言旣
通婿家遣使齎帖至門財禮首飾羊酒食盒副焉女

家答帖回送書墨筆硯之類二日擇吉標梅伊邇婿家訊擇吉期往告婦家送表裏細緞之類多寡不等婦家乃備奩具婿家預爲新郎新婦製衣一日娶親吉期既屆婿家用迎女女使二人婦家亦用送女官客二人不奠雁不親迎新入紅袍紅裙紅帕罩面登輿就途至門婿俟於大門入拜堂進房行合巹禮奩具豐者先期送薄者卽夕行成婚以後次日新婦拜見舅姑行廟見禮合歡之三日新婦父遣轎馬車輛迎請新婿夫婦婿至婦家設筵款待婿拜見婦之父母次拜見婦黨諸親款留宴飲越九日送婿歸家名曰合堂至

一月之後母家遣車騎往迎女歸一月乃還名爲對月而婚禮畢矣

一縣屬喪禮死之三日門前掛白開弔鄉里見白群往奠焉嗣後弔無常期至斷七乃止作佛事延僧道誦經士庶之家往往有之近來紳士用浮圖者絕少遵家禮者頗多居喪亦有素食獨居服闋始出門宴客者孝服紳士麻庶民布而已葬無定期發引前數日下帖至期行銘旌禮送葬啟殯就塗用紙札爲幡導墳墓一年三祭清明舉新火也中元嘗新穀也十月朔送寒衣也

一祭禮士夫奉祖先神主時饗於寢春秋祭於墓每年以正月元旦供獻祖先中元薦時食歲終又供獻焉楮用金銀箔摺錠白楮刻錢紳士有用春分夏至秋分冬至祭於寢清明七月十五十月初一祭於墓有不用金楮者

一縣屬三月十七日遠近男女負戴香楮登千福山神祠拜禱祈嗣四月初十日闔邑士民獻戲設供祭享城隍凡三日二十八日祀東嶽神祠五月十三獻戲設供祭享關帝凡三日六月初六日社臺山祭賽龍神凡三日六月十三日水神堂祭九江聖母士女駢

廣靈縣誌

卷四 風土

集鄉村二三月春祈八九月秋報在神廟前扮樂享賽若夫二月初三日文昌聖誕諸生獻戲享祭則衣冠士林之會也

一物產

粟穀 黍 稷 稻 大麥 小麥 蕎麥 莜麥

莞豆 黃豆 黑豆 菜豆 蚕豆 菹豆 麻子

葛秫 俗名高糧幹 葉如蕨而長 葫麻

菜屬

芥 芹 菲 茄 葱 蒜 蘿蔔 芫荽 萵苣

蔓菁 蒼蘆 蘑菰 蕨菜 黃花 鹿尾 落藜

莒菜 白菜 卜菜 地椒

菓屬

杏 李 蒲桃 按邊地嚴寒不產珍菓又士民朴儉不尚花木是以土菓比諸他郡邑尤少焉

瓜屬

王瓜 西瓜 甜瓜 葫蘆 瓠子

花屬

葵 芍藥 菊 玉梅 茨梅 萱草 山丹

十樣錦 石竹 珍珠 牽牛花 粉團 金盞

木屬

廣靈縣誌

卷四 風土

六

松柏 榆 柳 樺 槐 楊

草屬

葦 稗 艾 蒿 莠 茅 苜蓿

藥屬

黃柏 甘草 麻黃 大黃 柴胡 遠志 狼毒

黃芩 防風 升麻 蒼朮 秦艽 草烏 知母

地椒 斑毛 枸杞子 五味子 車前子 天仙

子 益母草 地骨皮 甘遂

羽屬

雞鵝 鴨 雉 鴿 雀 燕 鵲 鳩 慈鳥

半翅 鵲 鴉 鴛鴦

毛屬

馬 牛 驢 騾 猪 羊 犬 猫 狐狸 兔

麇 狼 虎 田鼠

雜屬

油 蔴 石灰 白土 磁器 砂器